

## Nitapenda kama Kristo Alivyopenda

Hivyo watu wote watatambua ya kuwa ninyi mmekuwa wanafunzi wangu, mkiwa na upendo ninyi kwa ninyi—Yohana 13:35.

Ikiwa tunataka kuwa nuru ya kweli kwa ulimwengu, lazima tudhihirishe roho ya Kristo ya upendo na ya huruma. Kupenda kama Yesu alivyopenda humaanisha kwamba ni lazima tujifanyie kazi kujikana nafsi. Inamaanisha kwamba lazima tuoneshe kutokuwa wabinafsi wakati wote na kila mahali. Inamaanisha kwamba lazima tusambaze kote maneno mema na tabasamu la kupendeza. Haya hayamgharimu kitu yule ayatoaye, lakini huacha nyuma yake harufu nzuri. Mvuto wake kwa mema hauwezi kukadiriwa. Sio tu kwa mpokeaji, bali kwa mtoaji pia, yanakuwa baraka; kwa maana yana athari juu yake. Upendo wa kweli ni sifa ya thamani ambayo asili yake ni mbinguni, ambapo harufu yake huongezeka kulingana na vile unavyotawanywa kwa wengine....

Mungu anatamani watoto Wake wakumbuke kwamba ili kumtukuza Yeye, wanalazimika kuwakirimia upendo wao wale ambao wanauhitaji zaidi. Hakuna tunayekutana naye ambaye anapaswa kupuuzwa. Hakuna ubinafsi katika mtazamo, maneno au matendo unaopaswa kudhihirishwa kwa wanadamu wenzetu, bila kujali hadhi zao, wakiwa wa juu au wa chini, matajiri au masikini. Upendo unaotoa maneno mema kwa watu wachache tu, wakati wengine wanatendewa ndivyo sivyo, huo sio upendo bali ni ubinafsi. Hautafanya kazi kwa faida ya roho wala kwa utukufu wa Mungu. Hatupaswi kuwekea mipaka upendo wetu kwa mtu mmoja au wawili.

Wale ambao wanakusanya miale ya jua la haki ya Kristo na kukataa kuiacha iangaze katika maisha ya wengine, punde watapoteza miale mizuri ing'aayo ya neema ya mbinguni, kwa ubinafsi huhifadhiwa ili kutolewa kwa wachache tu.... Ubinafsi haupaswi kuruhusiwa kujikusanyia watu wachache, ukiacha kutoa kitu kwa wale wanaohitaji msaada zaidi. Upendo wetu haupaswi kutunzwa kwa ajili ya mtu maalum. Ivunje chupa, kisha harufu yake itaijaza nyumba yote.